

蠡縣志

卷之六

蠡縣志卷之六

人物志 上

詩云高山仰止景行行止不有人物其曷典型蠡自漢迄明名儒碩士固不乏人而本

朝李恕谷王法乾尤卓卓北方之賢者也舊志選舉人物分爲二卷今雖仍之然彼重功名此重道德選舉之人有質行建偉績者復列於名賢仕蹟忠節之中知以選舉進者不以選舉重也若殉難之雖微必錄孝義之雖細必書亦猶歐陽一行傳之意云爾

蠡縣志


卷之六

名賢

名賢

漢

趙廣漢字子都涿郡蠡吾人少爲郡吏州從事以廉潔通敏下士爲名舉茂才爲平準令察廉爲陽翟令以治行尤異遷京輔都尉守京兆尹會昭帝崩而新豐杜建爲京兆掾護作平陵方上建素豪俠賓客爲姦利廣漢聞之先風告建不改於是收案致法中貴人豪長者盡爲之請終無所聽宗族賓客謀欲篡取廣漢盡知其計議主名起居使吏告曰若計如此且并滅家令數吏將建棄市莫敢近



者京師稱之廣漢爲二千石以和顏接士其尉薦
待遇吏殷勤甚備事推功善歸之於下曰某掾卿
所爲非二千石所及行之發於至誠吏見者皆輸
寫心腹無所隱匿咸願爲用僮仆無所避廣漢聰
明皆知其能之所宜盡力與否其或負者輒先聞
知風諭不改乃收捕之無所逃案之臯立具卽時
伏辜廣漢爲人疆力天性精於吏職見吏民或夜
不寢至旦尤善爲鈎距以得事情鈎距者設欲知
馬賈則先問狗已問羊又問牛然後及馬參差其
賈以類相準則知馬之貴賤不失實矣唯廣漢至

蠡縣志

卷之六

名賢

二

精能行之他人效者莫能及郡中盜賊閭里輕俠
其根株窟穴所在及吏受取請求銖兩之姦皆知
之長安少年數人會窮里空舍謀共劫人坐語未
訖廣漢使吏捕治具服廣漢嘗記召湖都亭長亭
長至界上界上亭長戲曰至府爲我多謝問趙君
亭長旣至廣漢與語問事畢謂曰界上亭長寄聲
謝我何以不爲致問亭長叩頭服實有之廣漢因
曰還爲吾謝界上亭長勉思職事有以自效京兆
不忘卿厚意其發姦擿伏如神皆此類也廣漢奏
請令長安游徼獄吏秩百石其後百石吏皆差自

重不敢枉法妄繫留人京兆政清吏民稱之不容
口長老傳以爲自漢興以來治京兆者莫能及
王商字子威蠡吾人父武封樂昌侯商少爲太子中
庶子以肅敬敦厚稱武薨商嗣爲侯推財以分異
母諸弟身無所受居喪哀慼大臣薦商行可以厲
羣臣義足以厚風俗宜備近臣繇是擢爲諸曹侍
中 卽將元帝時至右將軍光祿大夫是時定陶
共王愛幸幾代太子商爲外戚重臣輔政擁佑太
子頗有力焉元帝崩成帝卽位甚敬重商徙爲左
將軍而帝元舅大司馬大將軍王鳳顯權行多驕

蠡縣志

卷之六

名賢

三

僭商議論不能平鳳鳳知之亦疏商建始三年秋
京師民無故相驚言大水至百姓奔走相蹂躪老
弱號呼長安中大亂天子親御前殿召公卿議大
將軍鳳以爲太后與上及后宮可御船令吏民上
長安城以避水羣臣皆從鳳議左將軍商獨曰此
必訛言也不宜令上城重驚百姓上廼止有頃長
安中稍定問之果訛言上於是美壯商之固守數
稱其議而鳳大慚自恨失言明年商代匡衡爲丞
相益封千戶天子甚尊任之爲人有威重長八尺
餘容貌甚過絕人河平四年單于來朝引見白虎

殿丞相商坐未央廷中單于前拜謁商商起離席
與言單于仰視商貌大畏之遷延卻退天子聞而
歎曰此真漢相矣初大將軍鳳連昏楊彤爲琅邪
太守其郡有災害十四已上商部屬按問鳳以屬
商商不聽竟奏免彤奏果寢不下鳳重以是怨商
後卒爲鳳所傾免相三日發病歐血薨有詔長子
安嗣爵爲樂昌侯至長樂衛尉光祿勳商死後連
年日蝕地震直臣京兆尹王章上封事召見訟商
忠直無罪言鳳誣罔天子納之語在藝文志

按漢書漢有兩王商故蠡舊志辨北鄉五侯之

蠡縣志

卷之六

名賢

四

誤兩人皆帝外家一樂昌侯一成都侯前後進
丞相大司馬皆在成都帝朝帝知樂昌侯真漢相
不使剛毅之節廢於暗昧何以張匡之險詞一
入而合貲鉅萬私奴千數竟成賢宰之臯案彼
壞决高都漸臺白虎借帝明光更持國柄者空
動天子之震怒而不能膏薄昭之斧質倒持大
阿何以長世

明

薛大昉洪武辛亥聯捷進士初授縣丞歷官至布政
司使先是郡志列昉於講求治道科時韓春爲御

史夢一人負麩數枚來謁自稱薛太昉春覺悟知其爲作志者所屈今改列名賢

楊瓚鄭村人永樂甲辰進士授山西趙城縣令廉能有聲舉天下賢令第二陞鳳陽知府政績大著己丑入計推天下賢守十八人瓚居第四賜宴并衣一襲晉浙江左布政時陶得二鄧摩齊等作亂諭平之不煩兵革爲權貴所忌賞不行第賜紵絲表裏進二品俸尋卒時論惜之公持重有謀可當天
下大事都御史張楷輓詩有裴相未明平蔡事樂生空負下齊功嘉靖中祀鄉賢

蠡縣志

卷之六

名賢

五

張哲永樂甲辰進士授大理寺評事有寡婦曾氏私與人通忌其子誣以不孝繫獄哲疑之後數日令獄卒出他囚尸誑婦曰汝子已死汝來收掩密令人伺之見婦竊與一人喜笑卽併捕訊之得其情子以釋奏免冤獄胡景先等十三人歲久旱是日雨時謂雪冤所感晉江西僉憲條陳六事適賊葉宗流等寇山東勅哲督都督楊洪軍平之獻捷賜金幣拜雲南僉都御史以金創卒官

劉穆永樂乙酉舉人任北京兵科給事中言事切直不避忌諱屢謫屢起不變初志祀鄉賢

施信城內人永樂甲辰進士英敏雅秀家世寒微奮志勤學經史通貫初拜監察御史巡歷皆著聲奉母姜氏至孝陞浙江山東按察司僉事卒於官祀鄉賢

吳祥城內人永樂中知嵩縣爲政寬和適民自歸者二百餘戶縣有猛虎劫賊爲害祥乃禱神未踰歲獲虎二十餘賊黨亦各散去邑內遂安秩滿去吏民詣闕奏畱在任三十二年卒於官祀鄉賢

李宏景泰辛未進士任御史素行清介難干以私嘗巡歷有奸犯密令人以袋金書姓名事犯置察院廁壁間公入廁見之旣出以示衆明正其罪時論廉之祀鄉賢

王道東北泗人景泰丁丑進士授行人陞戶部福建司員外郎郎中時荆襄流民作亂道議郡縣其地悉入編戶奉命招撫帖然順治陞山東右叅議督理廣甯邊儲陞勸農叅政拜都察院右副都御史撫治鄖陽時流民野王剛作亂悉剿捕之撫鎮三省軍民咸惠兼濟祀鄉賢

馮貫大百尺人景泰甲辰進士授御史秉公執法風裁凜然陞大理寺丞尋爲本寺卿每議辟必折衷

理法義存欽恤陞都察院右副都御史南京工部
尙書老成持重爲一時儀型祀鄉賢

丁鳳字應韶成化間進士授戶部主事監督京通倉
臨清糧斛剗削宿弊改鴻臚寺寺丞累遷少卿南
京鴻臚寺卿應天府尹活繫囚百數晉左副都御
史總督南京糧儲奏革冗食軍匠五六千人入爲
通政使兵部右侍郎正德丙子冬兵亂宣府以都
察院左都御史提督軍務著武功蔭錦衣衛世襲
百戶平山東江西流賊優加敘資祀鄉賢

劉瑀北忠衛人成化丙戌進士初授御史按陝西風

蠡縣志

卷之六

名賢

七

岸峻整激揚不少假借監鄉試號得人尋陞蘇州
知府以簡靜鎮驕奢風俗丕變時有奉使江南採
方物者乃中官門下人頗有聲燭瑀視之如無所
見諸所需悉阻擢山西叅政會澤潞沁汾歲饑盜
起瑀廣賑嚴緝民賴以安拜福建山西左右布政
進副都御史督南京糧儲凡巨猾積弊釐革殆盡
祀鄉賢

和遜成化丙戌進士初授北京刑科給事中陞浙江
布政司叅議尋歸士多從遊成就後學之功居多
祀鄉賢祠

張貫北大留人成化乙未進士授河南知縣慈祥樂
易不爲苛刻擢南京湖廣道御史轉河南按察司
僉事整飭兵務邊境晏然宏治戊午陞四川副使
命出師平之賜綵幣陞四川副使貴州按察使以
持法忤逆瑾謫官叅議尋進右副都御史巡撫遼
東銳意邊務謹烽火明斥堠凡兵馬芻粟城隍整
堡率有成效賜璽書加二品俸蟒衣三襲卒於官
祀鄉賢

韓春南大留人成化辛丑進士授睢甯知縣時大旱
春自責請禱夜夢神柳義送雨果大雨三日劾平

蠡縣志

卷之六

名賢

八

江伯擾民罷之擢御史痛革時弊督修陵寢劾宦
官李興條議六事賜衣一襲銀五十兩尋陞山東
按察司副使逆瑾用事以剛罹禍遂歸進階亞中
大夫祀鄉賢

崔岑宏治癸卯舉人性行剛毅規模整肅閱及羣書
不專師授父母繼沒廬於墓側三年遠近士咸依
之兄沒撫其遺女撫育禮嫁如己出知榆次六年
政化大行後人思之勒於碑述治績彙爲錄傳焉

祀鄉賢

辛蘭小陳人宏治辛酉舉人授山東招遠知縣惠安

良善法戢奸宄捕土豪喬零星數惡而徙其家奸黨散落相率服罪者千餘人盡復其身招集流亡千餘家招遠大治祀鄉賢

劉錦宏治辛酉舉人授華州知府屬商山猛虎爲患授民以擒捕之法虎幾絕民賴以安山東盜逼潼關錦以武畧巡守盜聞匹馬無敢近關修撰昌柙爲製詞勒石值中官用事有廖姓者鎮守陝西文武吏咸怵慄阿附錦獨以剛正數忤之因被誣繫錦衣獄二載餘竟奪其官嘉靖改元錄其守正之節應詔起復知湖廣武崗州戊卒強悍素爲民害

蠡縣志

卷之六

名賢

九

錦至咸斂服民德之爲立生祠祀鄉賢

王凱宏治庚戌進士授南陵知縣慈祥豈弟務勤儉興士風勵民俗有豪民葉興因事殺李維屢以賄免死七年不決凱秉公執法興卽抵罪擢御史巡紫荆等關號令嚴明按關陝吏畏民懷復巡鹽課民利大興陞陝西按察司副使整飭固原兵備時寵宦盛行公以剛方自守未嘗有夤緣之私後陞山東布政司左叅政未至卒於途祀鄉賢

馮蘭大百尺人繇進士宏治間授吏部稽勲司主事歷文選司郎中守法奉文人不敏干以私陞通政

光祿寺卿工部左侍郎總理易州山廠蘭以清慎
公勤受特恩加蟒衣三襲嘉靖改元贈通議大夫
祀鄉賢

冉繼志萬安人宏治間進士授餘杭知縣興學校正
風俗禁師巫邑大治擢都察院都事轉本院經歷
值逆瑾用事繼志觸之捕下獄事白遷長子令歲
早禱雨輒應招集離邊邑人樹德政碑陞吉州知
州轉順天府治中陝西行苑馬寺少卿以疾歸祀
鄉賢

崔三畏嘉靖己丑進士任山西太谷縣知縣陞兩京

蠡縣志

卷之六

名賢

十

刑科給事中侗儻有才風節稟稟陞叅政惠政在
民祀鄉賢

陳善道城內人萬曆丙辰進士授浙江杭州府推官
陞刑部主事員外郎歷官嘉湖兵備陝西驛傳晉
四川督糧叅政按察使系任有治名引疾養母擇
田宅華腴讓兄王道寸幣不私撫諸姪有恩祀鄉
賢 以上舊志

國朝

彭之燦字了凡世稱鐵夫劉村人甲申後棄諸生從
孫徵君於蘇門未幾避去韓鼎業館之僧舍年餘

又棄去擔筇瓢遊嵩少王屋諸名勝耽食嗟來在
九山絕粒數日徵君挽之夏峯勸之歸餓夫曰吾
出門誓不再反不能蹈東海西山而死卽溝壑道
路無恨也戊戌六月竟坐死於嘯臺之旁徵君斂
而瘞之鑄石爲記題曰餓夫墓王漁洋有詩以吊
之

閻中寬字公度號易菴新興村人少聰穎十二歲補
博士弟子康熙己未進士歷官戶部郎中父大來
以義俠聞天下而已乃承以謹恂潛心書史安車
聘王五公於家事以師禮與京都一時名士結詩

蠡縣志

卷之六

名賢

十一

社有芸暉堂詩行世

李明性字洞初號晦夫孝慈先生門人私謚也西曹
家藁人儒行純篤不求聞達事親孝每日雞鳴趨
堂下四拜然後升問安食必手進疾侍湯藥潔拂
厠踰恒終夜不寐聞輾轉或噫咳必問雖百數十
無不應親歿毀瘠骨立三時不食菜果三年屏酒
肉居廬不入中門晨興必至墓所號泣前後六年
如一日雍正十年旌表事兄如父祭必齋必虔盛
暑必衣冠學宗孔孟不以後儒爲門戶負經世志
崇正末天下亂與鄉人習射守禦甲申後遂隱足

不履市年六十九卒王五公哭之日忠孝遺者盡矣子堪培世其學

王養粹字法乾北泗人少狂放十六歲入定州衛學嘗以文事從李孝愨於會孝愨語以道迄年十九奮然曰不作聖非人也遂取所讀八股焚之誦五經依朱文公家禮行禮顏習齋聞之納交爲日記十日一會考功過習齋書其名於筆筒每坐一拱敬對之志聖學力於行退食令門人站班高聲歌戰戰兢兢如臨深淵如履薄冰竦然拱聽乃退居必衣冠率家衆朔望拜祖祠父母禁鄉人佞佛閑

蠡縣志

卷之六

名賢

七

家人以禮終身確守程朱嘗謂習齋曰我輩究從程朱入又曰程朱何可操戈試看今日氣運是誰主持家讀其書取士立教致君澤民皆是也以講著多言爲戒不苟交一人不輕受一介時有聖人之稱康熙乙卯卒習齋慟哭曰吾無與爲善矣爲之持總服

李堪字剛主號恕谷西曹家最人其父孝愨先生與博野顏習齋爲執友命剛主師事之其學在忍嗜欲苦筋力勤家養親而以其餘習六藝經事務備天下國家之用立日譜記身心言行得失於大學

明親之業必欲見諸實事當是時山陰毛河右與
論樂律江左方望溪與質三禮大興王崑繩與治
古文南北學士多嚮之會講都下厯言古今升降
民物安危學術明昧之所以然以及太極河圖洛
書經史之真偽屯田水利天文地理兵農禮樂之
措置四座悚聽相顧曰乾坤賴此柱礎也嘗爲其
友楊慎修治富平期年政教行名動公卿間諸王
延經師主闔外者爭欲致之堅不就李安溪王太
倉相國前後擬薦於

朝皆力辭由康熙庚午舉人授通州學正浹月以母老

蠡縣志

卷之六

名賢

十三

告歸構講堂一溪繞門萬樹環座諸生以時說禮
敦詩肄琴習射從遊者日衆遠方郵書請正絡繹
不絕所著周易傳註學樂錄列入 四庫全書小
學稽業大學辨業學規纂論語學庸傳註學禮錄
擬太平策恕谷後集評乙古文版行於世詩春秋
孟子傳註學射御書數錄瘳忘編等書藏於家其後
版燬博野石氏重刻周易傳註高陽李氏成豐十
刻春秋傳註邑人張浩然等刻詩經傳註
年祀鄉賢

李培字益谿西曹家最人恕谷先生之胞弟也幼從
恕谷學後亦執贄顏習齋著有仄畫集行世

彭超字翔千劉村人歲貢生鄉人稱其事親孝事叔父如父友于兄弟睦於宗族篤於戚誼厚於朋友恤貧均役恤災賤糶廣育人才不爲利誘務本力田行已清白請祀鄉賢門人私謚爲文憲先生

彭度華字孟瞻號柳村與其弟喬華同領嘉慶甲子科鄉薦偕計入都遇有凍死人殭路旁心憫焉出囊金市棺掩之致資斧匱乏典衣而歸性嚴正禮法自持雖盛暑必整衣冠遭父喪三年不入內室事母孝雅善鼓琴每鼓之以博母歡家貧就館外郡屢掌書院有誤聽詩云無翼難奮飛鳴琴自理

蠡縣志

卷之六

名賢

古

性瀟灑三秋鴻天高雲影淨一曲甫及終萬念從此屏花院寂無人竹樹交搖映方思北窗卧境與心若競忽聞喚兒聲急起心欲迎雖然似我君鄰婦知何性嗟予他鄉客久矣蓬溫清其任曲陽訓導也上丁祭器古制無存慨然曰祭所以行禮也器不遵古何以爲禮製籩豆簠簋及俎鼎鉶皆如古爲諸生定課程認真改正一字不恕執經之履常滿戶外嘗曰人謂教官閒吾居官盡職覺無一日閒也卒於官曲陽人請祀名宦著有古文一卷日邁堂稿全集古詩二卷序史二卷日開錄一卷

彭氏家譜十卷俱待梓

仕蹟

元

馮守道大百尺村人元中統二年進士任西臺御史
有直聲風紀振肅

劉榮賓東蓮子口人任御史遇事敢言不避權貴
明

王紹宗在城社人宣德丙午解元初授教諭善教人
多所成就歷任監察御史

黃鏐父觀任浙江青田縣巡檢時正統十四年卸摩

蠡縣志

卷之六

仕蹟

五

齊陶得二作亂鏐自報義勇偽稱布政楊瓚男改
名楊鏐進寨說降之以功授東昌魏家灣巡檢陞
江西豐城縣主簿

喬儀景泰癸酉舉人任耀州知州守正循理一言一
動皆不肯苟

丁政鄰德人景泰丙子舉人初授知縣有惠政擢太
僕寺寺丞光祿寺少卿

崔翔景泰丙子舉人任含山教諭誨誘有方士多成
就

劉潮宏治辛酉舉人性行純雅授宿松知縣清苦自

勵以寬和爲理正陳仁僞券匿逋之罪化金鑿私刑凌衆之惡人服其神明調山東日照知縣釐剔宿弊邑政一新流民復業者五百餘家九載卒於官

陳傑宏治己酉舉人授新安縣知縣以績最陞鞏昌府通判督理甘肅軍餉處置得宜擢解州知州遷徽州平易近民民愛如父母新安民作去思碑

田荆正德辛未進士初授翰林院庶吉士散館補兵科給事中陞四川按察司僉事有政聲

孫應麟萬曆癸酉舉人授宜陽知縣招撫流移改河渠均徭役移粟挾荒士民戴之

崔科萬曆甲午舉人初任直隸冀州學正陞濟源知縣幼失怙恃貧苦自甘及抵任以廉公自矢賑救災黎捐修永利河以灌民田居家好施與親族咸待舉火不脩邊幅有古君子風

齊之祥號麟臺萬曆壬子舉人大璞不雕誠一無僞初授教諭累陞國子監助教司務工部主事管理街道篋無餘金家徒四壁

彭搏萬曆己卯舉人知鳳縣復知平陸縣當官廉平峭直操持凜然厯宦二邑家無餘藏孝親友弟素

稱敢睦

朱大化萬曆乙卯舉人居鄉以孝友聞任知縣注意節省持法廉平恤困疲而里甲弗費嚴科條而訟獄無寬六曹凜凜民戴其德

賈一之萬曆乙卯舉人授開封通判督馬政祛弊興利馬得茁壯孳息擢鳳陽宿州宿南北之衝會河淮之交流也民甚疲困爲之均賦役時催科省糧頭驛馬之苦革扛夫逋逃之弊流民復業邑里改觀署陳州冰蘖有聲盤錯不窘調荆門尋卒遺愛在人心焉

蠡縣志

卷之六

仕蹟

七

邊崙號巨峯龐家莊人萬曆乙卯科舉人初授東安縣教諭歷任北京戶部陝西司主事四川司員外浙江司郎中陞河南衛輝府知府出粟賑饑捐俸修城陞陝西副使撫治商洛道值流寇犯境指揮三軍擒賊整齊王獲首級數百又擒賊將小關鎖斬首報上撫按題薦九次病卒於任

賈訥丁酉舉人授河南彰德府林縣知縣縣素廢弛極力振刷久苦丁徭不均設法編審預取臨倉糧地冊烟門戶口冊全人丁通冊互爲稽查有夫亡而以婦人行丁者有戶絕而以族人包納者有有

地無丁而無地有丁者有壯年不丁而衰老猶丁者甚至有數口無一丁而一人應數丁者宜除者除宜注者注編審之下咸曰慈母而一時奸徒復飾說朦混訥出各冊示之衆皆心服稱爲神君至斥衙蠹靖盜賊救饑荒積勞成疾歷俸十四月乞休家居養重不預外事邑侯沈公迅贈詩有云先生真長者終日祇閣扉益可見矣

張師載號益子天啟元年拔貢初授山東萊陽縣縣丞多善政巡方御史薦陞河南唐縣知縣

賈雲鸞天啟間舉人任薊州學正教本學廩生張甫

蠡縣志

卷之六

仕蹟

六

冠等月課二次人才丕茂在滿陞山東鄒縣知縣驛路衝繁驛馬盡倒鸞至設法買馬盡捐俸薪自出馬夫迎送不累社甲蒞任秋蝗傷禾申文免徵聞蠡變慮成疾卒於官鄒民建去思碑

國朝

李運長己卯鄉進士以廷對考選內府兵科都給事剔弊鋤奸忠君愛國言必中乎急務事求協於時宜本章時奏不避艱險正直不回舉朝鼎仰加一級服俸

吳臣輔城內人癸未進士順治元年授國子監學正

考選禮部精膳司主事陞山東按察司僉事提學
道試牘充棟手自繙閱校勘精審選拔皆知名之
士科甲蟬聯人文蔚起葺學宮褒節孝祀名宦修
明正學獎掖後進入望宗之陞湖廣布政叅議分
守隴右道貞憲肅度威惠並施訓飭部內息事安
民勅建營房以處防卒民以不擾屬吏有以苞苴
營脫罪辜者白之臺使者具奏奉有清直可嘉之

百陞陝西按察司副使莊浪道赴任卒於涇陽郵舍
劉繼昌號世培崇正乙卯舉人順治二年授山東平
度州知州招徠百姓千丁墾荒田二千頃陞浙江

蠡縣志

卷之六

仕蹟

九

温州府同知廣東按察司僉事雷廉道值逆賊陳
博歐陽剛等竊踞監同鎮將粟養志等剿蕩僞軍
門李高孫學顯等招撫僞總兵朱達禮洪復元郭
龍章甯武英等收復廉州一郡合浦欽靈三州縣
又值逆賊李定國僞將軍高聞貴等馬步八千餘
賊圍城竭力距守逆賊宵遁經總督王國光彙疏
題敘歷陞陝西布政司叅議商洛道湖廣按察司
副使辰常靖州道值糧道吳執中在省黔運告急
代運米二萬三千四百餘石溢額二千七百石有
奇沅撫題參糧道并誣及昌部覆革任同籍

劉崇文蘭岡人號肇南崇正己卯舉人授湖廣荊州府興山縣知縣時僞逆竊踞未任回籍優游林下藜藿自甘孝事孀親教授生徒成就多人李恕谷爲學時肇南老矣時往問之

張萃城內人號正甫順治乙未進士初授大興縣教授陞國子監學正戶部江西司主事本部江西司員外本部江西清吏司郎中丁憂起補戶部江南清吏司郎中陞四川按察司提學道振紀興學惠政在民

吳美秀號在中城內人順治戊戌進士初授江南望

蠡縣志

卷之六

仕蹟

三

江縣知縣溫柔寬簡多惠政均徭役丈量蘆洲革去陋規銀數百兩陞淮安府北岸管河同知朝夕河干督工修築露宿風餐堤工告竣蒙總河王公光裕題敘奉

旨決口工成不比尋常勤勞可嘉着不拘定例從優議敘

部覆加一級陞江西饒州府知府值江西督撫題補有人改四川夔州府知府

吳英光城內人順治己亥進士任四川安縣地方荒蕪至縣手鋤荆棘結茅以處勸農課學諸廢俱興秩滿陞行人遇考選爭執賢能忤當事意去官回

里養親讀書著春秋捷錄

劉恒祥號臨河辛興人庚戌進士初授內宏文院庶
吉士散館任戶部廣東司主事尋陞員外清素好
學不染宦習

陳慎號注丹榆林村人選貢初授雲南師宗州知州
德撫居民四境懷德威服土裔九種畏威陞本省
楚雄府同知戎政整理軍務肅清陞陝西鞏昌府
知府山川多於田土羗邏襍以軍民素號難治寬
嚴互濟吏治民安設法完十餘年之脫欠屬皆佩
德

蠡縣志

卷之六

仕蹟

三

李復修號謙菴貢生初授雲南新平縣知縣僻處萬
山民蠻襍處多方安撫漸次歸化突值土司大變
僞將軍祿益等率賊數千圍城邑人潛謀內應密
計擒之孤城克保無虞總督卞題敘丁憂補廣東
四會縣縣中賦額朦混官多被累羈留不能交代
者六員徹底清查賦有着落完本任之糧併完前
任之糧各官藉以歸里上臺深嘉其能陞廣州府
同知嗣因韶府被逆黨馬寶等攻圍甚急蒙莽將
軍與尙王會議題補韶郡抵任而韶城北面已被
擊成平壤親冒矢石修築土堞如故食盡兵疲設

法買運糧草用資飽騰苦守三月危城獲全總督
金同各將軍彙疏題敘照軍功紀錄一次

張正乙亥拔貢澹泊甯靜素以琴詩自娛考定通判
改授山西太原府左衛經歷清勤自矢屢次進表
大兵剿陝委收忻州豆草軍需無悞兩署縣事事
治糧完無忝厥職

齊可魯歲貢歷任涿州臨城訓導修學課士膠庠改
觀人文丕變陞山東掖縣縣丞修墩堡而旬日工
成比魚課而逋賦盡完了艱回籍

郭文炳字郁甫後改字中孚西河村人康熙丙辰進

蠡縣志

卷之六

仕蹟

三

士選廣東東莞縣知縣實心愛民力圖振作邑有
新淤田舊鹽場也官責民租而不去其鹽課民苦
之爲詳請更正又邑之租賦舊皆大戶包攬猾胥
土豪上下其手文炳令拆戶各輸民得息重賦而
賦早完蒞事數載當事者疏公最績內擢戶部廣
東司主事條陳廣東通省輪租俱應拆戶以便民
致仕歸尋卒

蔣墩字念洙號遜齋東趙堡人康熙辛未科進士守
選家居南河汎溢爲患身先士衆以役堤工數歲
之中人慶安瀾除嘉魚縣知縣歷雲州知州公正

廉明士民感德上臺凡三卓異稱其政簡刑清內
陞禮部儀制副郎遷戶部江南正司外補浙江甯
波府知府益矢初心竭忠盡職厲飲冰酌水之操
居里蒞官儀型堪式

李會觀字遜來號鏡珊莘橋人由舉人大挑一等分
發山西補甯武縣僻近邊塞素稱難治會觀力爲
整頓除強扶弱澆悍漸消有報竊失去元寶九枚
者追捕月餘無踪密諭捕役僞爲緝到贓賊正犯
審訊定擬復令多方密爲察訪不數日果有攜銀
包自矜者詳加盤詰卽竊銀正賊也蓋其人聞贓

蠡縣志

卷之六

仕蹟

三

賊已獲以爲無事故敢如此後數月又有鄉人拾
遺金俟主認取者數亦九枚前後相形頑廉丕變
太守聞其事予匾旌獎以爲邑宰廉明之所致也
中丞知其幹濟調補陽曲首縣太原西門外有汾
水之患乾隆乙卯秋河水漲發城外居民幾遭湮
沒親撫恤撐筏渡入城中晝夜防守得免於災於
是修築堤防多栽柳爲護隄之用至今居民賴之
尋陞忻州值辦兵差先是州中兵差過境四鄉分
派車費城中首士設局承辦會觀傳諭鄉保所用
車費本州先爲墊辦無需首士支應較常歲省數

千金民皆感頌陞大同知府正身率下杜絕干請
嘉慶六年六月間淫雨十日夜不止所屬之渾源
州北門外河水漲發直冲城門北入南出居民漂
沒房屋坍塌聞報不待雨止卽行查閱至應州水
阻不能進乃用圈椅縛杆令人擎過至渾源卽開
倉庫賑濟民賴以活事竣具稟請罪並願捐廉賠
補中丞嘉歎以爲有古汲鄭風調補太原首府保
陞冀甯道再攝臬篆凡事無大小必親自裁處積
勞成疾卒於官

齊士雄字文豪號潛夫新興村人高陽籍乾隆丁巳

蠡縣志

卷之六

仕蹟

三

科進士初授陝西西安府平利知縣調陞海中府
沔縣知縣又調西安渭南知縣再選河南洛陽知
縣調歸德府商邱知縣當委辦河工督工下樁知
不堅士雄泅水拔樁出重責懲樁工以成能聲大
著歷任俱號廉明而在洛尤稱仁惠民感之願立
頌德碑建生祠力却弗受濟甯太白樓遺詩勒石
谷懷濬字景虞號毓亭南忠衛人曉亭主事之胞弟
也道光癸未進士除河南中牟縣縣距關陝之衝
瀕河多沙鹵田瘠而役繁民鮮終歲之謀甫下車
詢民疾苦凡所不便相時勢以調劑之邑感其德

請立生祠勃然變色曰吾輩居官祇期上不負國下不負民沽名邀譽豈予心哉力卻始止三年卓異題加同知銜負志欲希前賢魯公治不意蒞任僅四載因公進省卒於省垣未遂厥志中牟之民擁衙前雪涕不能已者數日居家時教授生徒務根柢學成全多人著有小椿山房詩文集待梓段金甌字茗村布里人道光庚子科進士幼有至行官山西山陰縣知縣廉介自勵在任多惠政有私訪官聲者鄉民皆曰好老漢紳士則曰良心官上憲以山陰清苦欲加調劑擬裁此缺金甌謂人曰

蠡縣志

卷之六

仕蹟

三

裁缺後吾固得美缺但此事實不便於民不忍爲也力陳不可事遂寢邑人德之欲建生祠力辭乃止調署潞城去任時閭邑送有清標鶴署匾額兼設香案送出境未幾粵匪突至城失守量減議罪發往新疆後以勤勞有功奉

旨回籍卒於家著有柯古堂制義小酉陽詩草鄉人私謚端信先生

王炳燿字榮南林堡人髫齡讀書過目成誦穎悟絕倫咸豐辛酉春入泮秋闈卽登賢書壬戌聯捷進士癸亥殿試以主事用籤掣戶部同治九年冬

奉

命督辦庫倫糧台事務其父入京視之送出廣安門外父已登車去猶惘惘不欲歸也比抵庫倫認真辦事十年三月十五日出門墜馬昏迷不醒越一宿而卒年三十有二前數日台勇多患疫孽語十五日接新城隍問爲誰則曰糧台王大人也旣而果中此讖勇之患疫者亦盡死矣嗚呼異哉豈生而爲英死而爲靈也與辦事大臣悼其沒於王事奏請扶柩馳驛還又經戶部奏請以知府

賜卹廕其子書科候選知縣

蠡縣志

卷之六

仕蹟

三

忠節

元

丁好禮字敬可蠡州人精律算初試吏於戶部辟中書掾授戶部主事拜監察御史陞侍郎除京畿漕運使講究漕運利病著爲成法人皆便之除戶部尙書時國家多故財用空乏好禮能撙節浮費國用以給拜中書參知政事時京師大饑天壽節廟堂欲用故事大譙會好禮言今民父子有相食者當修省以弭大患譙會宜減常度不聽乞謝事乃以集賢大學士致仕給全俸復起爲中書平章政

事尋以論議不合謝政封趙國公明兵入京城或
勸其謁大將好禮叱曰我恨無以報國所欠惟一
死耳後數日昇至齊化門抗辭不屈而死

明

傅誼生員段繼祖生員湯詢宋韓宗信正德辛未流
賊寇城誼等率衆拒守城破猶巷戰不屈爲賊所
害有司爲建忠義祠

王行健城內人萬曆己未進士任戶部廣東清吏司
主事管倉差五月報羨米二千餘石管新餉庫一
年報羨銀六千餘兩俱咨部紀錄任九江口鈔官

蠡縣志

卷之六

忠節

三

凡九閱月除正項解足外羨銀四千五百兩盡數
買銅解部公用以親老辭官歸養臺省薦章七上
曾未之出崇正己巳都城戒嚴倡義捐餉千金建
坊優旌修蠡兩關石橋往來永賴戊寅十一月

大清兵至蠡城分守南門信地不離十一日城破同長子

廩生奎光殉難死科臣沈迅具蠡縣死難奏到底
不離南城一步而被傷最慘者王行健也父忠子

孝祀鄉賢祠

蔣範化東趙堡人崇正戊辰進士歷官戶部郎中任
薊州邊卽會計各當差督湖廣糧餉軍需所儲不

留顆粟差滿同京貧窶滋甚致仕奉親甘心菽水
戊寅之難分守東城殉難死

周日強字泰萌號起甲鄭村社人舉萬曆己酉鄉試
初授山東利津知縣多惠政補河南武安知縣陞
陝西甯州知州流寇神一魁等圍困慶陽總督楊
鶴諭令宣布德意招撫神一魁等投誠嘉其才猷
題陞陝西按察司僉事巡守慶陽回籍值崇正戊
寅之變分守北城殉難死

彭昌允字阜蒼劉村人萬曆己未武進士歷任至保
定府總鎮協下中旗鼓管守備事務其未仕也寇

蠡縣志

卷之六

忠節

三

水大漲隄將決捐席數百片多備資糧率里人晝
夜防守水不爲災值歲荒出積穀數百石以濟饑
而不計其償再荒又如之罷官歸戊寅之難共守
蠡城殉難死長子庠生羽修次子庠生羽豐四子
儒童羽儀孫蘭哥俱隨營北去無下落三子羽翀
乘間逃歸後改名士奇以拔貢任長洲知縣

李節之明鄉貢任淮安府海州同知賦性溫良義嚴
取與時值寺人魏黨橫行而不事諂媚聽訟明決
盡絕贖鍰蒙兩院交薦反輿告歸志及離淮父老
泣送者百餘里蠡城戊寅之變捐城守銀三百餘

兩堅志報國城破殉難兵科沈迅題恤死難鄉紳
撫按爲建忠烈坊

賈爾慶城內人庠生加鳩臚寺序班賦性剛直屢徵
未仕教三子俱庠生崇正戊寅之變城破携三子
賈漢俱死節閣家二十二口從之而卒撫院旌云
忠孝種之一門

戊寅之變同時殉節者有廣平縣教諭李琳守城
東南角監生賈爾泰守城西南角監生李維精守
城西北角監生李建標恩貢孫繩祖武舉劉一中
王政舉生員張曉賈誠等四十五人皆抗節死難

蠡縣志

卷之六

忠節

三

國朝

張埈字季生號崧亭漢軍鑲藍旗人世屯居東河村
少有大志讀書十行俱下有文名由道光辛丑科
進士任山東冠莘定陶朝城等縣皆有聲朝邑素
多搶匪埈治盜認真境內肅清爲齊魯最上憲徵
其緝捕事下其法於諸路調蘭山未到任而以母
憂去官服闋安徽巡撫李嘉端指名奏請揀發赴
皖委署鳳陽鳳陽甫經髮逆蹂躪之後餘孽猶熾
埈剿巨散黨民得稍安泊賊陷廬州巡撫福濟調
埈赴店埠行營札署合肥幫辦糧臺總理合舒兩

縣團練培治事一無貽誤。欽差和春巡撫福濟建議以賊犄角擇謀勇兼優者斷其歸路培以奮勇告馳赴東南一帶收復桃鎮圍勦舒城斬馘頗多。欽差巡撫會請獎勵嗣督隊進剿三河賊匪接仗獲勝賊已敗竄適南風起賊乘風縱火各勇驚潰培猶指麾督戰力竭陣亡。巡撫以其事專摺奏聞奉

硃批張培著交部從優議卹加贈知府銜給予雲騎尉世襲

蔣式璘鄭村人道光壬辰科武進士授侍衛差滿任

蠡縣志

卷之六

忠節

三

福建邵武府守備歷陞貴州新添營都司昌霸營游擊咸豐四年髮逆竄擾江西式璘兩赴軍前遇賊於蘭儀鎮力屈殉難事

聞交部議卹給雲騎尉世職

殉難

明

王某武生南章人名字皆失考世所稱南章生也甲申聞變哭失聲已乃解其上衣大書崇正皇帝四字於胸以手捧之狂走且走且號聲動閭巷婦人孺子莫不爲之變色晝不食夜不眠三日以至於

死噫明季固多忠義然如此者亦希矣而舊志遺之不載悲夫

馮澤甲申三月流寇陷城殉節死

國朝

馬曰駭字次龍號冀山團丁村人幼能屬文試輒冠其曹困舉場二十餘年咸豐辛亥始中副榜授徒養母遷肅邑桑園村從舅居也同治六年梟匪作亂曰駭之子庠生鎮衡亦在外教讀被賊裹去乘間逃歸曰駭歎曰設我遇賊一刻不能活矣七年春髮捨入境保陽諸屬數經蹂躪曰駭辭館家居

蠡縣志

卷之六

殉難

三

遇賊被執見其衣服齊整索烟土與銀同被執者曰渠教書人焉得有此賊褫其裘曳至賊營賊首詢知其故還其裘衣之呼先生勸之從曰駭骯髒不屈拂衣欲出賊首曰勿出吾孩兒手碎曰駭竟出小髮賊以尖刀貫其項而死知縣謝恕上其事奉

旨賜卹給予雲騎尉世職

魏堂郡庠生北堰人素有膽通陣法初髮逆陷深州饒陽西張崗團局延堂練勇禦賊嗣經教匪梟匪接踵竄擾堂同練總協力防剿得保無虞及髮捨

入饒陽練總命堂護村自率勇拒賊戰一晝夜練
總陣亡堂聞報喟然曰我勇經堂團練十數年不
意爲此賊所挫練總死吾義不獨生隻身持刀赴
難手刃數賊身受重傷自刎而死

劉聚瀛邑庠生劉家營人習岐黃術不索謝鄉人德
之同治七年二月間捻逆過境遇賊不屈被戕死
劉春魁武生王家營人性剛直膂力過人同治七年
春捻逆張總愚竄擾縣境被擄至肅甯之窩頭村
迫之降奪刀手刃數賊力竭死之

張泰大百尺人同治六年八月間梟匪過境泰持木
蠡縣志
卷之六
殉難
三
棍出鬪身中數鎗鬪轉急羣賊合攻之力竭被殺
賊退鄉人殮其屍猶作張拳向賊之勢村人趙芳
王如意皆死焉

張大狗劉村人同治六年八月十四日梟匪突至迫
之拉馬引路不從被賊槍傷左股大狗奪槍大罵
羣賊圍攻遂死之

彭嶼字萃拔劉村人寄居高陽縣路台村同治六年
八月初九日梟匪過境被獲迫之降不從且罵賊
怒縛於柱剖其腹而死

姜良南齊村人同治七年正月間捻逆擾境有賊擄

少婦以行婦乘間投井賊去良往救之賊回馬刺殺良於井旁

石秉義洪善保人同治七年正月間捻匪過境脅之降秉義大罵賊殺之村人劉仲周榜皆殉難

齊用中庠生卧牛莊人性正直事親以孝稱同治七年正月間捻逆過境父步蟾母張氏年皆七十餘用中扶之登車走路遇賊奪其馬二老龍鍾不能行遣之去用中泣曰父母在此兒將焉往頃大隊至脅之降不屈與父步蟾皆死之

段德澤布里人茗村之胞姪也同治七年捻逆之變

蠡縣志

卷之六

殉難

三

被擄迫之從不屈賊殺之

李克讓七器村人同治七年正月間捻逆入村克讓持鋤刀與賊鬪斃一賊賊糾衆圍攻之斫其頭而去

王輯玉監生劉銘莊人同治七年正月間捻逆大至家人強之逃不從賊至脅之降不屈死之

冉福成史際世皆南郭丹人同治七年二月初一日遇捻被執大罵不屈刃傷而死

孝行

金

趙瑁木華黎爲太師經畧山南自中都南攻遂城及
蠡州皆下之初蠡州拒守力屈降木華黎怒將屠
其城時瑁從木華黎爲署百戶泣曰母與兄俱在
城中乞以一身贖母兄之命哀懇切至木華黎義
而許之遂全其城

明

劉敬給事中穆之猶子也穆以諫事忤旨將刑敬甫
弱冠痛穆無後擊登聞鼓願以身代上憫其孝義
赦穆復其官朝野聞之無不感嘆

王經判官璠之子父卒事母趙氏孝養懇至母患癰

蠡縣志

卷之六

孝行

三

湯藥必親嘗衣不解帶朝夕拜祝祈安衆皆嘆服
施邦憲僉事信之從孫幼以神童充邑庠弟子員事
父母以孝聞母張氏卒廬於墓側朝夕號泣郡守
趙公嘆曰孝子必如施邦憲

張視奎庠生城北桑園村人賦性忠誠確守儒業母
故廬其墓三年以孝稱

國朝

趙國正新興村人趙得祿子順治五年母李氏故廬
其墓號泣不已計三十月而歸縣令旌其門

賈雲鵬廩生賦性莊雅養老撫幼撫按舉優行數次

其大畧云孝事孀親友撫幼弟養恬而超俗行潔而可風

以上舊志

張人龍庠生城內人賦性謹厚自其幼時動必率禮後事繼母尤能得其歡心居喪廬墓凡九年終身未嘗爲不善邑人共舉其孝奉

旨褒獎立坊

戴性字展亭城南戴家莊人氣稟剛方孝友敦篤父母之喪廬墓三年乾隆年旌表

戴濯纓字清溪城南戴家莊人庠生善屬文天性孝友幼時父卒事母至孝承顏怡志色養終身兄毓

蠡縣志

卷之六

孝行

三

蘭文學善書謹事之不懈爨兄歿撫孤姪有恩年六十有六無疾而卒

谷凌岱字瞻岳號霽園南中衛人少雋異讀書多妙悟顧數奇逾三十始補弟子員秋試一遂絕進取專意養親視富貴蔑如也父患脾泄乃校方書治藥餌雖文中子之於銅川不是過焉中年後兩遭大故哀毀骨立杖乃起自殮及殯皆依馮服古所訂士喪禮行之有弟一嘗中寒疾適他出未知也心忽怦怦動買舟亟歸而弟儼在卧榻躬親調養弟旋愈嗚呼非至誠所致而能然耶時有以兄訟

弟者飲以酒爲談古今孝友事其人悔且泣遂改行他如葬故友食餓人周鄰里使不鬻宅見屠者必勸改業種種善事在人耳目間宜其二子皆成進士而孫曾科名不絕云

王書芸字林閣號蘭圃北關人天性孝友讀書外無所嗜好幼時仲兄主分爨弗能止乃不受田而攻苦讀書冬夜無膏火燃香照讀咳唾成冰誦不輟泊中嘉慶庚申鄉魁硯田所入奉父母同居甘旨無缺一日館歸見母色若不豫詢而知爲仲兄孫子多故泣然勸曰兒不貧則舉家不貧矣分爨猶

蠡縣志

卷之六

孝行

三

之共爨也母容頓霽爲之加一餐父母卒葬如禮服闋選授遷安教諭伯兄無子迎養兄嫂入署和悅怡怡十餘年如一日自奉儉約居恒布衣屨食一飯一蔬積俸錢爲仲兄治產買田百餘畝築屋十數間爲姪孫輩皆娶婦承先志也迄於今宗族鄉黨稱孝友者無間然生平邃於經學手批四書會要錄二十卷抄纂五經註解至老不休

段永凝字謚亭布里人廩膳生入棘闈七薦不售稟性篤厚事父母孝疾痛疴癢必親自抑搔教授生徒不索束金人以爲陰隲先生教六子皆成名著

有仁山文稿

段金詔字諾齋監生布里人性敦謹讀書以修身爲主目不邪視遇有談人聞聞者少者加訶責長者則趨避之父永和得癱瘓症服勞奉養衣不解帶者四年歿後居喪如禮二十七月不入內忌日必至墓前展拜淚泫泫不休一方稱純孝焉

段金墀字對軒布里人謚亭之第六子也道光己亥舉人天性孝友十歲失怙號痛哀毀卽如成人隣里皆爲感泣以大挑二等教諭需次時兄金甌謫戍烏魯木齊辭不赴選與兄偕行兄賦詩云念汝

蠡縣志

卷之六

孝行

三

有官當北上憐予失職伴西征一時工畫者繪有聯吟出塞圖題詠甚衆從戍三年路經萬里險阻備嘗當時之人莫不矜式後署懷來縣教諭著有葩經拾餘錄鹿莊詩草西征詩草

田墀字丹屏林堡人事父母孝親喪廬墓三年旌表給孝思維則匾額

王調元字燮亭西百尺人署衍聖公府平陽屯屯官幼時父外出十七年無音耗長而歎曰天下豈有無父之人哉於是習醫爲尋父計有自關東回者云瀋陽東六七百里許有百尺王姓在彼多年聞

之泣涕遂行至京師刻尋父報帖抵通州足重爾
難行方愁資斧不給又無路引不易出關忽有大
車數輛來跪懇就車車中人憐而登之乃知大遼
河同鄉醬園夥頭也遂同出關迢迢千餘里不費
一錢不勞一步豈非孝感哉至遼河有僧而外科
者曾療一瘡半載不愈薦使治之數日而痊受儀
數千卽東行尋父所在逢人則流涕跪懇與之報
帖求其傳布過瀋陽會天陰雨陷泥失屨皇皇而
東貼報帖徧咨詢乃得與父相認迎之歸計出關
之期凡七越月古云純孝格天殆與博野顏習齋

蠡縣志

卷之六

孝行

三

之尋親後先燭映矣自是醫學大進內外兩科活
人無算其子正森太學生能以醫世其家

齊堃字坦易號東人城內人性質誠樸篤孝友敦任
卹奉父母凡飲食嗜好恒先意承志嘗親手調羹
以進侍父疾不解帶者數月彌留之際同胞兄弟
生塋長跪請訓遂得不許交接官長干預公事之
遺命終身遵之兄弟皆稱端士父歿擗踊痛絕含
殮如禮及母歿亦如之禮葬一遵乎古當母在時
嘗慮其母家胞兄與姪貧堃曲體親心請於母迎
大母舅養於家與還欠債若干卒具衣棺葬之後

又與表弟園田五畝二妗母無子孀居不時饋送及卒亦具棺葬之此又母卒以後不忍死親之意也與兄析箸時有祖遺間莊基一所讓兄終身怡怡如一日他如與族人還帳買棺其睦卹之行固又多已習岐黃內經類經諸書熟如口誦活人甚多不索謝儀設藥舖遵法炮製藥必良至今人猶稱焉

王三錫字擢之劉銘莊人道光丁酉科拔貢才優學富學使潘芸閣先生甚器重之承雙祧事四親以色養稱曲意承旨能博堂上歡融融洩洩宗族鄉

蠡縣志

卷之六

孝行

三

黨無間言設教於鄉及門士多所成就性寬和與世無忤美鬚髯善談吐晚年精岐黃術不拘拘於古方而動與古合名噪數百里間全活甚衆年七十四歲卒遠近聞之無不墜淚云

李攀桂字占鰲庠生宋崗人品行端方孝友敦篤父彬雅亦文庠六十餘歲得中風症攀桂日以延醫和藥爲務進飲食敬抑搔必親侍奉晝夜罔離衣不解帶歷十年如一日也鄉黨宗族咸以純孝稱之

吳清雲萬安村人父貿易甘肅值兵變道梗未能回

籍清雲甫十一歲隻身乞食迎父回家奉養終身無不竭力清雲卒村人爲之流涕

吳汝蘭萬安村監生性至孝善事父母待弟汝蕙友愛終身不衰逢歲荒濟急憐貧村人沾其惠者甚衆知縣王賜匾額曰孝友可風姪孫監生瑞堂施棺木恤窮困費銀二百兩人以爲能承先志云

冉自芳萬安村人幼失怙家貧事孀母孝母年九十餘每日勸進四餐必親手調和數十年如一日母病衣不解帶者三年人共稱爲冉孝子

翟維仁大陳村儒童事父母以孝稱父母歿送葬不歸築屋半間廬墓三年未及旌表而卒

朱龍海劉村人業耕織爲全家衣食所賴父好酒使氣龍海曲意承志輒能霽其顏父得罪鄉里卽稽首謝而自請罪鄉人怒亦釋娶妻母不喜龍海曰妻所以奉親也豈以怒親乎遂出之其始也父愛少子而惡龍海後乃更深憐之而諸弟亦無不聽命矣

徐樂兒南宗人爲人類癡愚蝸居外無恒產農忙則爲人傭工暇則採樵自給時行乞於附近里墮間是以鄉人皆忽之少時父卒及長母病痿痺負以

出入寒則衣之饑則食之渴則飲之便溺則拂拭而澣滌之冬則負以向暖夏則負以就涼且時負以如其妹家有故他往必先以瓢水筐糗飲食其母而後行樂兒鶉衣百結僅足蔽體母則暑單而冬絮如是者歷十餘年如一日居斗室鄰人欲以重價購之執不肯售母歿始鬻居得值以爲棺衾殯葬費日向之不售爲今日計也此後吾事畢矣經云事父母能竭其力若樂兒者庶幾不愧焉

洪世祿字邁種南于八村農人也早年失怙貧未娶事孀母孝母病癱瘓盡心奉養出則負以行坐則

蠡縣志

卷之六

孝行

聖

扶以待每食問所欲而自食糠粃赴市必買食以獻衣衾便穢時爲湔浣面髮垢亂日爲梳洗諸弟或代之不願也夏種瓜旁置筐擔卧母於團焦偕諸弟冒暑灌畦母饑卽擔以歸冬織布母室中檢枯柴烘衣衾夜寒以已衣覆母身自著單衣而軋軋之聲恒終夜不輟也母歿哀毀骨立抔土成墳年節墓祭淚常沾臆以椎魯農夫而至性過人洵足愧世而勵俗矣同治九年壽七十歲而終鄉里共稱洪孝子云

齊如奎監生大曲堤人性端謹以孝友稱乾隆五十

八年秋嫡母兄桂林以積欠國課千餘金繫獄如
奎典賣田產措銀五百餘兩偕同母弟焜燿代爲
完納不以析居稍有吝色知縣汪公大枚謂之曰
世間最難得者兄弟汝兄弟竭蹶赴義誠足多也
予亦代納五百兩縣試特拔焜燿爲冠軍

義行

金

齊建官副尉五房村人漢關內侯蓋之苗裔也爲人
重義輕財好仁樂施大定壬午飛蝗爲災人皆乏
食減價糶米粟以濟貧人後至庚寅河水泛溢大

蠡縣志

卷之六

義行

聖

傷禾稼又減價糶米如初辛丑年間復遭水旱人
苦饑僅慨以所儲之粟貸與鄉里五百餘釜賴其
利者亦孔多矣時有軍民相爭田數百餘頃失其
業者無以爲生毅然倡率鄉中冤抑者若干人控
告於所司歷州縣至朝省積年方決曲直乃分然
後人各得其所安居樂業者幾千人焉其利溥哉
鄉人勒其善行於石其辭曰猗歟齊公桑梓克恭
素朴是尙浮華靡崇上和下睦矜恤孤窮仁德力
勉家因自豐但願義全不爲利惑旣克禔身誰非
矜式垂示後昆仰欽貽則是用刊碑流芳罔極承

安五年歲在庚申鄉貢進士趙知章撰也節錄齊建善行

碑記
增入

明

施太五夫社人為本縣醫官先是與白剛為友以女許為婚姻剛病太問疾見剛危曰吾以女許親必不以存亡失信剛卒太果自備緘匭送女歸於白氏士夫無不嘆羨

田泰在城人有于八口社劉強遺柴夫銀十五兩於城外泰拾之求而歸強強欲與其半竟不受

劉繼周高晃社人多藏好義施藥餌建義塚歲凶給

蠶縣志

卷之六

義行

三

鄉鄰以粟四方流落者日施一粥捐穀百石以備賑輸錢數萬以造橋知縣劉申請撫院汪旌其門朱際昌生員贖李升已賣妻費銀八兩母子夫婦不散代鄧大解冤賠鹽商失物救命贖朱學師母難助銀二十兩救荒捨米十石施棺埋屍施藥濟人沈姚二令給匾獎之

賈坊雲鸞子邑庠生舉優行性情恬靜純篤不浮友恭於內和睦於外救荒施糧十石銀十兩撫按匾獎修城捐銀五十兩守城晝犒城兵夜給柴薪道縣匾獎

賈瀚年篤孝友輕貨利收姚明府之骸骨于瀛海積屍之塲而殮送故里捐趙賓江之逋債於身沒之後而焚券免償施棺掩骼澤及枯骨倩醫施藥恩能回生懿行芳蹟可以敦薄廉頑

以上舊志

國朝

閆際泰號大來新興人幼而聰慧讀書能文明末重武遂以武科爲陝西都司喜交游周人之急於睦族尤重老而無養者衣食終其身死則棺斂葬之壯而不能嫁娶者男則擇配女則具匳習以爲常間及鄉黨貧乏亦若是捐上田六十畝創建義學

蠡縣志

卷之六

義行

四

凡一鄉子弟不能自延館師者悉就讀出糧百石立義倉託殷實有行者數人春放秋收積之數年致數百石庚申年大凶貧民四百餘口賴以存活貧病不能請醫者施藥與之又捨地數畝爲義塚甲申之際萑苻成羣養里中少壯數百人守護鄉間盜不能犯遇歲饑復施粥賑之陽谷秦氏子八歲被掠賣與紅旗代贖之還其家後游泮筮仕南王村姚某被同姓投東誣拔部提星火子婦行哭憐其寃與銀贖之本鄉甄可成舉室鬻旗伊親止此一子痛甚成疾捨金代贖本邑吳定襄居官清

潔母歿哭而死幼子不能歸賻白繆百兩持喪回
趙孝廉亮令長武丁父艱庫欠未完不能旋里爲
之奏鏹完虧並給資扶柩歸葬約千餘金置不問
西甯張少參子美肅州李副憲方悅皆廉吏也興
疾回籍數千里程囊空如洗各贈朱提數百金得
抵舍其在秦也以三十金契買家人王三三孤兒
也臨歸遺去不收其贖他如立文社修橋梁焚券
不計償拾金還其主義聲藉藉傳美談焉子中寬
以名進士官戶曹清白廉靜能世其家

劉起聲字宰宇短小長髯強幹有口才壯時尙義氣

蠡縣志

卷之六

義行

五

排難解紛親友有急能仗助晚年產落浩歌拾薪
無愠色嘗應里保長永清一黠役挾起聲里人爲
盜者來緝盜投文蠡令趙下里氣轉張甚陰縱爲
盜者逸逮其族人縲而拷之起聲爲解役曰汝解
他孰爲汝解起聲曰將誰何役曰將拷汝起聲曰
拷則殺汝役曰明明日月朗朗乾坤而敢殺人起
聲曰明明日月朗朗乾坤而敢拷人鳴炮紮鄉兵
縛而暴諸日役曰何時殺起聲曰尙有須卜夜耳
及夜半牽之行役以爲果殺已也窘呼至半途解
之鳴於趙令令具文解巡道使與起聲訟不勝責

柳黠役奉頭慙謝去

楊東嵇南齊村人性情樸實好善樂施雍正季年高邑安瀾橋日久失修將有傾覆患東嵇施錢米若干修葺之高陽知縣嚴題其門曰樂善不倦

魏文召鄉飲大賓北堰人行已正直待人忠厚雍正初年歲饑義賑捐粟二百二十石以襄倉社知縣周題風高指困匾額旌其門村人勒碑誌德

魏浩字荆川北堰人由舉人官內閣中書彭孟瞻孝廉邑之端人也稱其家素封能善用財濟人甚衆而不居其名大書每驕每吝四字於門以自戒嘗

蠡縣志

卷之六

義行

四

遇歲凶鄉人無以餬口傍里有壑數十畝乃令填之而給以食鄉人不知其所爲也豈以黠敖食餓示色嗟來朱家贍貧矜情任俠豪舉之風懦者不肖乎及觀其壬子大饑出粟賑濟閭鄉匾其門曰德洽鄉鄰雖不居其名而名亦歸之矣

魏瀨北堰人由歲貢援例授布政司經歷乾隆五十七年旱饑出粟義賑歿後鄉人思之立碑焉

扈昌南堰村監生乾隆五十九年大饑村民多乏食昌有藏粟慷慨出以濟之里人高其義送匾額曰德被鄉鄰

王騰蛟北齊村人嘉慶乙卯武舉任漕運千總寄居
良鄉之張家場周急爲懷義聲載路時有兇盜不
論晝夜公然入室坐索酒食良邑苦其虐而畏其
威乃設方以除之邑民咸感其德凡蠶人至良邑
投止者計程贈費無不豐足及回里值歲荒出穀
濟饑不計其償鄉人思其德至今猶嘖嘖不絕於
口云

李奇觀北齊村人道光乙酉科武舉任江西饒州所
領運千總有儒者風與弟奇逢極相友愛急公好
義同弟施義田五十畝爲合村辦差鄉里貧人莫
不被其周恤四方乞旬日給一餐遠近稱爲兄弟
善人閭鄉建碑以報其德

張浩然字善養庠生解元南齡五世孫也持正不阿
方嚴好義友人祝元燮豪士也拆樓以償舖債浩
然見之立赴舖改帳於已周折代償存其樓終日
閉戶兀坐蕭齋而市僧衙胥一時爲之斂跡蓋正
氣之所懾云

吳錫齡字用九庠生城內人孝廉精一之子也性莊
重不佻樂善而好行方便凡貸錢者久不償卽焚
其券諸姑多賴以養妹適龐夫婦依之居割映日

三十二畝宅一所與之寡親支從堂弟某貧不自存撫與同居爲之一娶再娶生子有孫而其子樹森乃短命孫壽朋亦殤善人無後君子惜之

馬庭梅字占魁太學生隨東人少孤苦力學已而課農桑喜任俠持家勤儉而待人敦厚睦鄰任恤之聲著里間焉村多貧戶凡有借貸不計其償不能辦差徭者爲之代辦無吝色幸以爲常乾隆壬子大旱米珠薪桂通里嗷嗷公務一條計無所出乃慨然出貲以濟難捨穀以賑窮鄉人感其德越二年甲寅立善人碑報之

蠡縣志

卷之六

義行

四

馬德煌字仲仁郡庠生占魁之次子也父以義行著於鄉債不責償積券若干父卒商於兄盡火之爲村出力減差徭凡以承其先志精岐黃術診脈能知生死時有名醫之稱性端凝笑言不苟閭室危坐如對大廷喜讀書手不釋卷殖學藝圃式穀墨莊名利不入於懷塵雜罕櫻其慮逾古稀而卒鄉人思之樹德碑距其父善人碣十數武相輝映焉馬先鳴字聲遠大團丁村監生世多隱德慷慨好施村西大路低窪夏秋間多陷溺苦自捐錢三千餘繕修橋以便往來鄉人德之題其橋曰便農橋併

爲建旌善碑以誌不忘

田種玉字懷珍楊家莊貢生富而能仁曾於本村自修太安橋閭村感德

魏廷瑞字鳳祥齊家莊監生性謹厚樂施與事繼母以孝稱同治七年間連歲兵荒人多菜色慨捐穀數十石接村中戶口多寡酌量調恤又捐地六十畝以備閭莊差徭之用鄉人感德送任恤可風匾額併建旌善碑

孟繼聲萬安村庠生亞聖裔也持品端方職受孟廟齋事廳樂施與每拯困濟急代人償銀百兩無吝

蠡縣志

卷之六

義行

晃

色無德容一時欽其行誼

賀靈字銘心號鑑古賀家營人習儒業守正不阿冠婚喪祭遵古制爲祖塋立祭田屆期齋沐率族人致敬盡禮見善斯勸見惡斯憎敦樸素斥浮華爲鄉人所矜式焉

宋默字慎言監生後劉市人性倜儻樂施與村土瘠民貧差徭較重吏胥追呼咸苦之慨捐錢數百千爲之代辦知縣丁承衍題其門曰樂善不倦鄉人爲之立旌善碑

齊恒德五坊人持家勤儉樂善好施同治十三年蠡

邑大修瀦龍河堤年荒役重村民苦之慨捐錢三百五十千又助柴米若干知縣彭美匾其門曰急公好義鄉人爲之立善人碑以表其德

展義成張村人性廉介行不由徑一物不虛取汲水恒在已井井坍汲人之井必投錢人皆笑其迂赴小陳集路拾錢票若干千遂不赴集坐於其處逢人問之無認者次日又坐其處遇其人說相符還之其人分以錢票不受也小可見大亦拾金不昧之流亞歟



